

## Kayuhan Santai Merdeka bendung gejala sosial

OLEH LIZAWATI MADFA | 14 September 2017 12:19 pm



SHAH ALAM, 14 SEPT: Lebih 300 peserta menyertai Program Kayuhan Santai Merdeka, di bawah program Sukan Untuk Semua, Rangsangan Sukan Selangor (RSS) di Kampung Delek Kiri, Klang, baru-baru ini.

Pengarah Bersekutu, Perhubungan Awam, Media dan Tanggungjawab Sosial Korporat, **Kumpulan Perangsang Selangor Berhad** (Perangsang Selangor), Mohd Fauzi Mohd Ghazali berkata, ia merupakan antara inisiatif pihaknya membendung gejala sosial dalam kalangan remaja.

Katanya, program anjuran bersama Clever Speda itu juga bertujuan menggalakkan masyarakat bergiat aktif dalam aktiviti sihat dan bermanfaat.

“Baru-baru ini, kita dikejutkan dengan berita remaja di kampung sekitar ini terlibat dengan perlumbaan basikal haram.

“Maka, kita anjurkan program ini dengan memilih tema sambutan Hari Kebangsaan agar peserta dapat menghayati serta menghargai nikmat kemerdekaan dikecapi selama 60 tahun,” katanya.



Selain mengayuh, peserta juga berpeluang menonjolkan kreativiti dengan menghias dan memperagakan keunikan basikal masing-masing serta memenangi hadiah menarik.

Mohd Fauzi berkata, peserta turut diberikan tips keselamatan berbasikal oleh bekas pelumba basikal negara yang kini merupakan jurulatih profesional Clever Speda, Hadi Putra Ismail.

“Tahun ini merupakan tahun keempat kita bekerjasama dengan Clever Speda di bawah RSS.

“Menerusi kerjasama ini, kita menganjurkan sembilan klinik berbasikal, empat kursus dan satu kejohanan bakal diadakan pada tahun ini dengan menyasarkan penglibatan 820 peserta seluruh Selangor,” katanya.

Sejak 2014, Perangsang Selangor melalui program RSS berjaya melahirkan bakat baru di dalam arena lumba basikal untuk mewakili Selangor dan negara di kejohanan peringkat nasional mahupun antarabangsa.

Antaranya Muhsin Alredha Misbah, Mohd Fitri Sharil, Mohd Izdihilmi Shamsudin, Zamirul Adlisham Zulkefli, Nur Faseha Adila Mohd Yunus dan Nurkhairunnisatul Aina Mohd Fazli.

<https://selangorkini.my/2017/09/kayuhan-santai-merdeka-bendung-gejala-sosial/>